

Paulo Ena Marere Ibaruana

TESALONIKA

Haukia Herekiaia

Puka Aona Irerena 'Abina

Tesalonika ai maearima bo'ona rani weianai hanona teraona raona ki'a baha Keriso ena mue mai hanona taba kerama. Maearima baika hanona te'abi Obiapaka ena rani hanona aba emai. Ua buonai Paulo marere neiana ererena maearima ekia a'ikakauma kebaberon. Ia nehina benakia Obiapaka ena rani hanona a'i nikara'au baha. Ba rani weiana a'i nimai baha hanona maearima bo'ona katehaia po'o, mai babai ki'a haeai haeai ikoikia kateapa'ua, haeamona rauhuhu ikabena hanona kemai Keriso i'oatana apa'uanai keao.

Paulo ia nibataburanakia a'ikakaumai katekora 'ini harai, mai puma wairakia tiropo haukia katekabanai harai. Ena nuatae hanona katetabura ki'a baha weiana kipokia kate'ima harainakia, ihobona ia kipona ne'ima haraina mai ia kipokia tiaka haeamo haukia 'abakia. Weiana aka herenai a'i kate'abe'abe 'ao a'i kate'aboro, haeamona maearima ibaraikia a'i kate'aboro.

Puka Paipana Apa'uakia

- a. Roba iahu. (1.1-2)
- b. Banamo mai rauhuhu 'abikia. (1.3-12)
- c. Keriso ena mue mai ba'iofikia. (2.1-17)
- d. A'ikakauma maurina tohana. (3.1-15)
- e. 'Abi orekia. (3.16-18)

Banamo 'Abina.

1 ¹ Au Paulo, Sila^a mai Timoteo emai marere tarerena niwahi marea robe haumi Tesalonikai tomiaho haumi heremi, wai hanona Tirama

^a 1.1 'ao *Silvano*

Hamaka mai Obiapaka Iesu Keriso 'eukia.

²Tabahuba'ari Tirama aika Hamaka mai Obiapaka Iesu Keriso ekia aoko'o hoana mai baibua hanona ahamiai kemiaho.

Keriso Kemai Bero Akana Kebabaina.

³Uaho'abamai e, ai wai paumiai rani ikoikiai Tirama namo 'abina tabena, weiana hanona ebero pokina wai emi a'ikakauma hanona niapa'ua hao apa'ua hao, mai emi raona'au ha ha heremiai mai 'abami herekiai hanona nikara'au niao. ⁴Hau haiara ikoikiai mai baihobo ikoikiai aokiai tubapahihi abomo emi a'ikakauma a'i tuhabona, weiakia haukia Tirama ena marea ha ha haukia wairakiai tapainakia.

⁵Taba neiakia ikoikiai tibawaira tinana hanona Tirama ena bakaiai tebero. Wai Tirama ena obia aiarana paunai bariu haiara tuhoaina, ia keao puana hanona wai bero katoa'ina Tirama ena obia aiarana haumi. ⁶Tirama hanona mai ena bero. Ia kehore weiakia wai teba haiaranimi haukia 'arafia kebamuenakia keba haiaranakia. ⁷Haiara tuhoaina haumi wai ai kipokia 'araka kebenaka kaharai. Obiapaka Iesu kupai kewaira tina ena aneru taburakia kipokia katemai raninai neiana hanona kerama. ⁸Ia kemai mai iruba upana, weiakia Tirama a'i te'iobina haukia mai eka Obiapaka Iesu ena pou namona aiana a'i tika'aina haukia hanona puma kebahoainakia. ⁹Ia katehaiara banaibanai mai puma katehoaina abomo katekatu'a baihana Obiapaka wairanai mai ena hiabu nuabina herenai. ¹⁰Obiapaka kemai beraurana weianai ena maearima robekia katekuti aina mai weiakia tea'ikakaumana haukia ikoikiai katebanamona. Weiana aonai wai abomimo baiatakiai weia pokina pou tahinana wai heremiai hanona toa'ikakaumana.

¹¹Neiana taraonana paunai, ai wai ahamiai tabahuba'ari to'ona, weiana eka Tirama kehore miaho banaibanai haumiai kebaonimi ena apari ihobonai, mai ia kehore ena hiabuai emi hoahoa anikia namokia kebaramanakia mai emi a'ikakauma akakia ikoikiai kebatohanakia.

¹²Taeara neianai eka Obiapaka Iesu atana wai paumiai katebanamona, ba ia paunai wai katebanamonimi, eka Tirama mai Obiapaka Iesu Keriso ekia aoko'o hoana paunai.

Hau Pairipairi Tiaporo Kewaira Tina.

2 ¹Uaho'abamai e, eka Obiapaka Iesu Keriso ena muemai abomo aika ibararoka ia herenai hauna pouna tahinana, ba tanoinimi, ²aomi a'i katenoanoa, mahabanai 'abikia 'ao 'abi baika 'ao marere heremai ai ewahi na tiho ti'abi Obiapaka ena beraura aba emai hanona wai a'i kebata'unimi 'ao nuami a'i ketae. ³Hau ha taeara neianai a'i ke'oinimi. Pokina beraura weiana hanona a'i kemai baha keaomo maearima Tirama katemurina kate'oata 'uaina ba hau pairipairi tiaporo kewaira tina, ia

keao 'ekana hanona haiara banaibanai 'ekana. ⁴Ia hanona maearima tekuti ainakia tabakia ikoikiai mai tiaparinakia tirama na tiho haukia ke'oatanakia, ia kipona kehorotina neiakia ikoikiai arakiai abomo keao Tirama ena marea robe aonai kemiati ba ke'abi ia kipona hanona Tirama.

⁵Au wai heremiai raninai taba neiakia ikoikiai ahinabe ainimi, weiana wai a'i turaona 'ininakia, u? ⁶Abomo bariu wai aba to'jobina hiabu tabana nihore ia nia'i 'inina weiana keaomo ia ena rani tohanai hau weiana kewaira tina. ⁷Pokina hau pairipairi tiaporo ena hiabu aba niaka bunianai, 'a ia weiana bariu nia'i 'inina hauna kea'i 'inina keaomo ia kehe pare. ⁸Ba hau pairipairi tiaporo kewaira tina, iamo Obiapaka Iesu kemai raninai pinana maeabunai tiaporo keahu 'arina mai ena nuabiai kebabuana. ⁹Hau pairipairi hanona Satani ena hiabuai kemai hiabu bai'oikia haesai haesai, babai bai'oikia mai hoa apa'uakia bai'oikia kebabai, ¹⁰mai aka ki'a obokia haesai haesai ai ni'oinakia ia hanona kate'ari haukia. Ia kate'ari pokina 'abi tohana weiana mauri kebaibeni hauna iraona'au aina teubo aina. ¹¹Pokina neiana buonai Tirama ehore ahurea raonana hiabuna aokiai ehorotina keaka, ia bai'oi weiana katea'i taeana. ¹²Weiana 'abi tohana a'i tea'ikakaumana haukia mai ki'a teaonamo aina haukia ikoikiai hanona puma katehoaina.

Tirama Etina'animi Bamauri Katoa'ina.

¹³Uaho'abamai e, wai Obiapaka niraona'au ainimi haumi, ai wai paumiai rani ikoinai mo Tirama namo 'abina katabena, pokina popounai Tirama etina'animi,^b ba mauri katoa'ina Auba Robe ena hiabuai, mai emi a'ikakauma weiana 'abi tohana herenai haunai wai Tirama ena maearima robekiai katoao. ¹⁴Tirama ehore pou namona weiana ai heremiai tairoro aina haunai eaparinimi tomai mauri robena neianai, weiana emi itau eka Obiapaka Iesu Keriso ena nuabi aonai katoa'ina. ¹⁵Ua buonai uaho'abamai e, katokori 'ini, mai emai ba'ioi 'abikia tairoroai pinamaiai tahina 'ao marere ai tabenimi haukia kato'ini benakia.

¹⁶Eka Obiapaka Iesu Keriso mai aika Hamaka Tirama tanoinakia, ia hanona eraona'au ainaka ena aoko'o hoana aonai batabura banaibanai mai buabeni namona ebenaka, ¹⁷ia kehore aomi kebakirona mai kebataburana rani ikoinai aka namokia katobabai mai 'abi namokia katohina.

Ai Paumaiai Katobahuba'ari.

3 ¹Uaho'abamai e, orenai ai paumaiai katobahuba'ari, Obiapaka ena pou kerama otarai biaina ba katea'i taeana mai aonamokia ihobona wai heremiai erama 'abana. ²Abomo katobahuba'ari weiana Tirama

^b 2.13 'ao *Tirama etina'animi ena buabua kori'uainai*

kehore po'o haukia mai aka ki'a haukia herekiai keba karahinamai, pokina maearima bo'ona Keriso a'i tia'ikakaumana.

³A Obiapaka hanona aia ibabua 'au hauna, ia kehore kebataturanimi mai ke'aeanimi aka ki'a haukia herekiai. ⁴Ai Obiapaka aonai wai tabatohanimi tabahi ahinimi aka naiakia tubabainakia haukia katobabai to'ona.

⁵Obiapaka kehore aomi ke'uai ainakia Tirama ena raona'au anina mai Keriso ena bapahihi hoana kato'iobi harainakia.

Aka Namona Ibabainai A'i Katohauhororo.

⁶Uaho'abamai e, eka Obiapaka Iesu Keriso atanai taharabunimi, uaho'abaka weiakia tiaboro 'ao ba'iobi tabenimi ihobokiai a'i temiaho haukia herekiai katokapare. ⁷Weiana ai tababaina hauna wai kipomi aba to'iobina aea katoka'a aiho. Ai wai heremiai raninai a'i ta'aboro 'apua. ⁸Ai maearima ekia aniani a'i tani 'abaea ia 'arakia tahorenakia, ai hanona rabi mararani taka taro'ari pokina wai puma a'i tamabenimi. ⁹Ua tababai aiho hanona ai mai emai bero baraibarai weiana kata'ina, 'a neiana tababaina hanona ihaiha tabana wai taaranai katoka'a.

¹⁰Ai wai heremiai aonai bairobe neiana abomo tabenimi, "Hau ha a'i keaka raninai, ia a'i keaniani." ¹¹Ai 'uru tao'o baiatamiai maearima baikha hanona te'aboro, aka ha a'i tibabaina tiaomo maearima baikha ekia aka aokiai titoto. ¹²Obiapaka Iesu Keriso atanai tahina benakia mai tabahi ahinakia, katemia 'ororo ekia aniani tabu akakia katebabai ekia aniani katerama.

¹³Uaho'abamai e, wai aka namona ibabainai a'i katohau hororo. ¹⁴Hau ha emai ba'iobi 'abikia marere neiana aonai a'i nia'i taeanakia hauna hanona katoihana 'inina, ia kipokia a'i katobahamomo, ba kipona abiabina keonobaina hanona kehaumaea. ¹⁵Ia hau weiana katoihana hanona 'ou haunai a'i katobaona, 'a uaho'abami ai katobaona katorobena.

Banamo 'Abina Orena.

¹⁶Obiapaka hana eka baibua pokina hauna, bariu ai tanoina ia kehore kipona baibuaобенimi. Rani ikoinai mai taeara ikoikiai Obiapaka hana wai ikoimiai heremiai.

¹⁷Au Paulo e'u banamo 'abina neiana ima'u tohanai narerena, e'u marere ikoikiai aokiai hanona na narere aihonakia katobatohana au e'u marere.

¹⁸Ai tabahuba'ari eka Obiapaka Iesu Keriso ena aoko'o hoana hana wai ikoimiai heremiai kemiaho.